

Eibenstock

■ Ne „Zeitreise vom Urknall zum Menschen“ – un mir mittndrinne!



Unner Eimstocker Haamitvoren war im Mai ze Gast im Planetarium Schneeberg.

Mir warn e paar Leit zeviel als wie die do driem Plätz ham – also noch drei Stiehl nei un lus konnts gieh. Dor Chef vun den Sterneguckerhaisl - dor Behnke, Maik - hat uns herzlich Willkomme ge- haassn un dorklärt, des mir itze eweng imdenkn müsstn un uns 14 Milljardn Gahr kosmische Welt-

geschichte zamneigequescht innern einzign Gahr vürstelln solltn. Des gieht doch gar net, dacht iech erscht. Aber in den Vürtroch hat siech des dann doch ieberaus gut dargestellt.

Unnere Wissnschaftler genne dodorvu aus, des des riesiche uvorstellbare Universum mit nern Urknall aagefange hat un siech aus verschiedene Gasn ieber nor uvorstellbarn lange Zeit Sterle un aa Planetn entwickelt ham, wos mit gewaltign Sternexplosjone un Kometneinschläch of dar Ur-Ard bis zur Entwicklung vu unnern Labn als Menschn gefiert hat.

Also noch emol zen vorstieh: Dor Urknall wär demnooch an 1. Januar gewaasn, jeder Tog in den Gahr wär 40 Milljone Gahr lang, de großn



Foto: Sternwarte Schneeberg mit freundlicher Genehmigung

Dinosaurierle sei nooch dar Bemessing erscht oder schu an 30. Dezember noocherts ausgestorbn un unnere heitiche Zeit wär erscht su kurz vor Mitternacht an 31. Dezember – also an Silvester – aakumme. Allermacht – des muss mor siech erscht emol vürstelln kenne!

Aber des ging durch die schenn Filmle, die do an dor Plantarium-Deck nagezaubert wurn sei, dorwagn ganz gut: Sternestaub, Sterneexplosjone, de erschtn Planetn, dann de erschtn Pflanzn - ach du lieber Schrack do komme de Dinos an dor Deck ieber uns har - un schließlich warn mir do, de Menschls!

Des ganze schiene multimedjale Filmwark ham verschiedene Planetarjen wie Mannheim un Münster entwickelt, su des is jeder dorwagn vorstieh kaa. Des war e schiens Dorlabnis for alle. Zen Schluss hat uns dor Chef noch in aktuelln Sternhimml gezeichnet, wie mor ne eingtlich gar net su ze sah kricht, weil ja ze viel elektrischs Licht in dor Nacht brennt un do kaa mor när de hellstn Sterle sah. Esu war aber dor Planetarjum-Himmel voll Sterle un mir ham aa noch de Sternbilder dorklärt kricht. Allis in Alln e ganz lehrreicher Noochmittich.

An Obnd – wie kaas annersch sei – wurd dann noch neine Rüff eingerickt, denn de Sterleguckerei hat aa genuch Hunger un Durscht vorursacht. Des war dann e guter Ausklang vu den Tog un mir warn fruh, des mir dorwagn e schiens Labn of unnerer Ard ham!

Bis zen nächstn Bericht vu unnern Voreinslabn – dor Schmidt

Hinweis: Das Planetarium in Schneeberg bietet in den Ferien interessante Programme für große und kleine Kinder an. Termine finden Sie unter „Veranstaltungen“ oder online unter: <https://www.sternwarte-schneeberg.de/events/>

